

21. April 2017

**Uunga siunnersuut: Imaani avatangiisit illersorneqarnissaat pillugu Inatsisartut inatsisaat nr. xx, 2017-imeersoq.**

(Namminiilivinnermut, Pinngortitamut, Avatangiisinut Nunalerinermullu Naalakkersuisoq)  
Inatsisissatut siunnersuut, Siumumiit imaattumik oqaaseqarfigissavarput.

1993-mi nunatta imaanut akisussaaffeqarfimmi, imaanilu allanngutsaaliuinnermut akisussaaffik tiguaa. Imaanilu akisussaaffeqarfik 3 sømiilit tikillugit imartaq, tassanilu imartat kangianiittup avataaniittullu akisussaaffeqarfiusut pineqarlutik.

Ukiut siuliini imartanut akisussaaffeqarfiup tiguenerata kingorna nutarterinerit, aammalu naleqqussaanerit pisariaqartut inatsisartuni suliarineqartarsimapput, pingaartumik mingutsitsinaveersaarnermut avatangiisinullu illersuinnermut tunngassuteqartut.

Siumumiit iluarisimaarparput inatsisissami annertuumik pinngortitap avatangiisillu illersorneqarnissaat pitsaasumik tunngavissinniarneqarmat, taamaasilluni inuiaqatigiinni ineriartorneq aallaavigalugit aammalu nunatut aalisartoqarfiusutut imartatta mingutsaaliornissaanut piumasaqaatit ersarissut inatsisitigullu naleqqussarsimasumik tunngavissinneqarnissaat inatsisissatut siunnersuummi anguniarneqarmat.

Pingaartumik maluginiagassaavoq inatsisissatut siunnersuummi immami avatangiisinut inatsisissap nunani tamalaani inatsisinut atuuttunut naapertuuttunngorsarniarnera. Taamatullu nunatsinni avatangiisitsinnut tunngasunik annertuumik naleqqussaaniarneq kiisalu nunatsinnit kissaatigineqartunit piumasaqaatinillu aallaaveqartumik nutarteriniarneq.

Siumumit pingaartipparput nunatta imartarujussuani nunatsinnilu inuiaqatigiinni aalisarnikkut sineriassuatsinni inuuniuteqartut, nunattalu avataanut tunisassiatta annerpaartaat imartatsinneermata avatangiisitta illersortuarneqarnissaat, piujuaannartitsinerlu naapertorlugu aallaavigalugulu imartatsinni mingutsaaliuineq akisussaassuseqartumillu inatsisiliornikkut atugassaqartitsillutalu tunngavissaqarnissaq pingaartilluinnaratsigu. Tamannalu uani inatsisissami pitsaasumik siamasissumillu naammassiniarneqarmat iluarisimaarparput.

Taamatut oqaaseqarluta, innersuussutigissavarput inatsisissap aappassaaneerlugu suliarineqannginnerani ataatsimiittitaliami susassaqtumi suliarineqassasoq.

Knud Kristiansen  
Siumut